

Na osnovu člana 124. stav (2) alineja d) Zakona o visokom obrazovanju Kantona Sarajevo prečišćeni tekst („Službene novine Kantona Sarajevo“, broj: 22/10) i člana 92. Statuta Univerziteta u Sarajevu, Nastavno-naučno vijeće fakulteta na sjednici održanoj 7.12.2015. godine odlukom broj:01-4292/15 usvojilo je:

## **UPUTSTVO O NAČINU STUDIRANJA NA DALJINU FAKULTETA SPORTA I TJELESNOG ODGOJA (DL STUDIJ)**

### **Član 1.**

#### **Predmet Uputstva**

Uputstvom o načinu studiranja na daljinu Fakulteta sporta i tjelesnog odgoja (u daljem tekstu:Uputstvo) uređuju se uvjeti i način studiranja na daljinu.

Studij na daljinu je formaliziran sistem edukacije samofinansirajućih studenata kojim se, korištenjem kompjuterskih tehnologija i interaktivnih nastavnih materijala, osigurava pristup nastavnim procesima.

### **Član 2.**

#### **Cilj**

Studij na daljinu (Distance Learning) na Fakultetu sporta i tjelesnog odgoja organizuje se u cilju:

- osiguranja šireg pristupa visokom obrazovanju;
- prilagođavanja studentima koji zbog svojih profesionalnih i drugih obaveza nisu u mogućnosti prisustvovati redovnom izvođenju nastave;
- osiguranja dostupnosti pojedinih programa novim ili širim skupinama studenata;
- internacionalizacije studijskih programa;
- prilagođavanja potrebama učenja uz rad ili odabranom stilu života;
- omogućavanja studentima kojima odgovara fleksibilan način studiranja da studiraju i putem interneta – učenjem na daljinu;
- podrške klasičnoj nastavi;
- omogućavanja nezavisnosti mjesta i vremena održavanja nastave;
- omogućavanja samoorganizovanja vremena za učenje.

### **Član 3.**

#### **Usklađenost**

Studij na daljinu organizira se u fondu sati prilagođenom studentima koji nisu u mogućnosti pohađati redovni studij.

Studij na daljinu je usklađen sa principima Bolonjske deklaracije, Zakonom o visokom obrazovanju Kantona Sarajevo i Pravilima studiranja prvog i drugog ciklusa studija na Univerzitetu u Sarajevu.

Status studenta koji studira učenjem na daljinu stječe student koji studira prema posebnom nastavnom planu i programu.

Student studija na daljinu koji je položio sve ispite predviđene na upisanom studijskom programu i ispunio sve ostale obaveze propisane Statutom Univerziteta i ovim pravilima stiče diplomu

odgovarajućeg ciklusa studija i odgovarajuće stručno zvanje u skladu sa Pravilnikom o korištenju akademskih titula i sticanju naučnih i stručnih zvanja na visokoškolskim ustanovama u Kantonu Sarajevo.

#### Član 4. **Organizacija nastave**

Studij na daljinu se organizira i provodi fleksibilno, kombinacijom kontaktne (*in class*) nastave u učionici i nastave u formi učenja na daljinu (*online*) uz pomoć savremenih sredstava učenja na daljinu (informacionih tehnologija, računara, računarskih mreža i specijalne softverske podrške za audio prezentacije, interaktivne i multimedijalne materijale).

#### Član 5.

Nastava studija na daljinu (*distance learning* studij) je organizovana po semestrima, kao i nastava na redovnom studiju.

Nastava u svakom semestru traje 15 sedmica.

Za studente koji studiraju učenjem na daljinu Fakultet će u svakom semestru organizirati nastavu u učionici i to najmanje prve, osme i petnaeste sedmice svakog semestra i o tome će voditi urednu evidenciju čija će forma i sadržaj biti utvrđeni odlukom Nastavno-naučnog vijeća Fakulteta, a u toku ostalih sedmica u semestru, student prati nastavu putem interneta (*online*).

Rasporedom nastave, koji se usvaja na početku studijske godine, bit će utvrđen fond sati nastave (teorija i vježbe) koja se realizira u učionici, a koji ne može biti manji od 1/3 ukupnog fonda sati nastave utvrđene nastavnim planom i programom.

Studenti koji imaju status vrhunskog sportiste u slučaju neispunjavanja obaveza prisustva nastavi koja se organizira u učionici, najmanje prve, osme i petnaeste sedmice, obavezni su istu odslušati u terminima koji će biti određeni u dogovoru sa predmetnim nastavnicima, o čemu će nastavnik voditi evidenciju u pisanoj formi.

#### Član 6. **Nastavni materijali**

U svrhu izvođenja *online* nastave, predmetni nastavnici i saradnici su obavezni za studente studija na daljinu, kreirati audio prezentacije, interaktivne i multimedijalne materijale, koji su 24 sata/7 dana dostupne studentima putem interneta.

Audio prezentacije obuhvataju gradivo predviđeno nastavnim planom i programom za tekući semestar.

#### Član 7.

Audio prezentacije, interaktivni i multimedijalni materijale trebaju biti kreirani tako da studentu omogućavaju samostalno savladavanje gradiva.

Programi podrške treba da omoguće i različite načine komunikacije sa nastavnikom, kao i ocjenjivanje znanja putem interneta (testovi, diskusije na određenu temu, zadaće, studije slučajeva, seminarski radovi, video konferencije, testovi za samostalnu provjeru znanja iz određenih tematskih područja).

#### Član 8.

Obaveza je nastavnika da za sve predmete osiguraju dostupnost adekvatne literature koju studenti mogu posuditi iz Biblioteke ili pristupom *online* biblioteci.

#### Član 9.

##### **Ocjenjivanje i struktura ocjene**

Nastavno-naučno vijeće Fakulteta će posebnom odlukom utvrditi sve oblike provjere znanja, kao i strukturu sa skalom bodovanja za svaki nastavni predmet, a ista mora biti prezentirana studentima na prvom predavanju i dostupna putem interneta.

Studenti studija “učenje na daljinu“ obavezni su prisustvovati oblicima provjere znanja, kako je predviđeno silabusima predmeta na svakoj visokoškolskoj ustanovi, koje se, po pravilu, obavljaju u toku onih radnih sedmica u kojima se organizira i nastava za ove studente.

#### Član 10.

##### **Ispiti**

Ispitni rokovi i termini su regulirani odredbama Zakona o visokom obrazovanju Kantona Sarajevo.

Ispiti za studente koji studiraju učenjem na daljinu obavezno se održavaju u sjedištu Fakulteta.

Student može pristupiti ispitu pod uvjetom da je ispunio obaveze utvrđene nastavnim planom i programom studija.

#### Član 11.

##### **Tehnička podrška**

Fakultet je, u skladu sa mogućnostima, obavezan studentima *distance learning* studija obezbijediti adekvatnu informacionu platformu, internet konekciju, e-mail adresu i konstantnu tehničku podršku, a u cilju efikasnog odvijanja *online* nastave.

Sastavni dio ovog akta je Uputstvo za korištenje sistema za učenje na daljinu i Uputstvo za studente o načinu korištenja sistema za učenje na daljinu.

#### Član 12.

Za sve što nije regulisano ovim Uputstvom primjenjivat će odredbe Pravila studiranja za prvi ciklus studija Univerziteta u Sarajevu i Pravila studiranja za drugi ciklus studija Univerziteta u Sarajevu.

### Član 13.

Ovo Uputstvo stupa na snagu danom usvajanja na sjednici Nastavno-naučnog vijeća Fakulteta i bit će objavljen na oglasnoj ploči i web stranici Fakulteta, a primjenjivat će se do usvajanja Pravila studiranja na daljinu Univerziteta u Sarajevu.

UNIVERZITET U SARAJEVU  
FAKULTET SPORTA I TJELESNOG ODGOJA  
DEKAN

Prof. dr. Nusret Smajlović